

ХАНТЫ ЯСАҢ

24 января 2019 года

www.khanty-yasang.ru

№ 2 (3518)

Основана 1 ноября 1957 года

Айдат эви финно-утрәт күтн кәсты пйтл



Максим Менг верум хур

Елена Шуганова

Ханты эви Елена Шуганова тәм олдн «Мисс студенчества Финно-Угрии – 2019» кәсупсыя мәнл. Щи олдән уша йис, хән Югорской государственной университетн округ мир эвет күтн кәсупсы вәс.

Иса щәта няд кәсты вер вәс. Олдәлдн эвет дыв вердал олдәнн путәртсәт, щәлта жюри ех едпийн рәт мир ләмәтсухн яңхман шәшсәт. Рәт ясәән лүңәтты арәт путәртсәт, жюри ех дывәт арсыр мосты верәт олдән иньщәссәт. Иса эвет эвәлт дыв Елена Шуганова пирисәт.

Тәм эви Югорской государственной университетн нядмит курсән вәндтгылд «психолого-педагогическое образование» тәхийн. Лүв хәнты, тәп рәтлал күтн сәран ех ищи вәлдәт.

Елена айдат пураядн «Нумсәң ех» нявремәт пәта рүтгьщәты тәхия яңхәс. Щәта лүв «Куренька» якты, нарәсьюхн юнтты вәндтәсы. Щәлта лүв «Сны забытого стойбища» спектаклян юнтәс.

2013-мит олдн Елена Шуганова Германия мұва яңхәс па Югра мұвев щәта ванлтәс. 2015-мит олдн лүв «Юва» этнообразовательной тәхи ех пидә Емвошн садикәтн нявремәт пидә әмәц вәйтәнтупсәт ләщәтәс, ләдн пушхиет хәнты па вухаль мир йис вер уша ат павәтсәт. Интәм Елена рәт ехдал юх верты дәнхал.

Хәнты ясәна тулмащтәс
Надежда РАГИМОВА

Рѐт ясӑң давадты ол кеша...

Ван хӑтлуп тыдӑщӑн округ оса тӑхет департамент хуша мирхот вӑс, шӑта арсыр кӑчайт, депутатӑт, айкелӑт ӑкӑтты ӗх, учӑныйт ӑктӑщийдсӑт. Мосл лупты, 2019-мит ол – щит ООН генеральной ассамблея ӗх щирн Мӱвтелд мир шуши мир ясӑңат ол. Щирн мирхотн ӑкмум ӗх путӑртсӑт, муй дыв па одн рѐт ясӑң давадты пӑта верты питлӑт.

«Хӑнты ясӑң» па «Луима сӑрипос» газетайӑн юкан кӑща не **Галина Кондина** путӑртӑс, хутыса интӑм газетайӑңлӱв интернет хуша арсыр тӑхетн лӱнӑтты рӑхл.

«Югра дьднуптӑты» немпи шуши мир округ

оса тӑхи кӑща лӑңкӑр не **Ульяна Данило** лупӑс, лӑдн «Югра» немпи телерадиокомпанияйн хӑнты па вухалд ясӑңӑнӑн передачайт ат лӑщӑт-сыйт. Щи телеканал хуша рӑпитты ӗх лупсӑт, хуты нӑмӑсты питлӑт, муй щирн щит верты.

Округ оса тӑхийн рӑпитты не **Мария Замятина** нӑтупсы вух унтасн рѐт ясӑңӑн етум газетайт па журналӑт олӑнӑн путӑртӑс. Ин вет непек етл: «Хӑнты ясӑң», «Луима сӑрипос» газетайӑнӑн па ям арат ол юхды сӑрхӑнд хӑнты ясӑңӑн «Айкол» газета вӑс, хӑнты нявремӑт пӑта «Хӑтдые», вухалд пӑта «Витсам» (хӑнты щирн «Йиңк сем») немуп журналӑн. Па одн Сӑрхӑнд районӑн йилпа «Айкол» газета етты пӑ-

та вух нӑтупсы мӑсы.

Ас-угорской научной институт кӑща не Виктория Сподина путӑртӑс, хуты дыв научной рӑпатнеклад ям арат ол мӑр нявремӑт пӑта рѐт ясӑңӑн хурӑң ай кинишкайт хӑншлӑт. Щитӑт па хон пелӑк ясӑңӑта тулмаштуман вӑлдӑт. Лӱв лупӑс, хуты ши вер елды тӑты питлӑт па ши киникайт хоттелд ӗха мойдӑлӑт, лӑдн нявремӑт айтелдн рѐт ясӑңел сӑмӑңа ат тӑйсӑт.

Людмила ГУРЬЕВА

Рӑпата нух вантсы: тӑса мӑнд

Мӑнум одн ван хӑтлуп тыдӑщӑн Ӓмвош кӑща хотн Координационной совет немуп мирхот мӑнӑс, хута ай павӑтсы, муй щирн пирӑщ па мӑшӑң хуятӑта унтас верды. Щи олӑнӑн арсыр департаментӑтн рӑпитты мир путӑртсӑт.

Культура департамент рӑпатнек **Наталья Михайлова** лупӑс, мӱң мӱвевн щимӑщ тӑхи верты питсы, хута пирӑщ ӗх па ветеранӑт вӑлупсы олӑнӑн арсыр вер нух хӑншман питл. Щи тухӑлпи лӱв «Гастрольная карта Югры» немуп ут олӑнӑн ай павтӑс. Шӑта хӑншман, хута вӑнлат якты-ариты ӗх, муйсӑр кӑртӑтн па вошӑтн па пӱш ариты па якты питлӑт. Лӱв лупӑс, «ар пирӑщ ӗх иса юдн омӑслӑт, немхулдӑт ӑн яңхлӑт». Щи мира нӑтты каш верты хотӑтн вандтупсӑт, якты-ариты хӑрӑт, дуңалтупӑт па экскурсияйт верӑнтдыт. Щиты юдн омсыйдмум ӗх каш верты хотӑта яңхты пиньщӑлӑт. «Тӑм хӑтл Юграйн 201-кем арат Центр общественного доступа немуп тӑхет киникайт мийдӑты хотӑтн рӑпитлӑт, хута вӑнлат ӗх компьютерн рӑпитты вӑндтӑлдыт. 2016-мит ол вӱш эвӑлт

Югра Государственной библиотекайн щимӑщ ут вӑл, щит унтасн пирӑщ ӗх арсыр ут олӑнӑн уша павӑтлӑт. «Природы и Человека» немуп музей интернет тӑхи па «Музеи Югры» немуп ут лӑщӑтл. 2019-мит ол вӱш эвӑлт 2024-мит ол вӑнты виртуальной немуп якты-ариты хӑт тӑхи пӱншды, щит унтасн Большой па Мариинской театрӑт лунӑлтупӑт вантты мӱвев мир питлӑт», – ай павтӑс Н. Михайлова.

Здравоохранения департамент кӑща лӑңкӑр не **Елена Касьянова** путӑртӑс, хутысаты электронной щирн пӑдницийт рӑпата лӑщӑтды. Щит 2018-мит ол вӱш эвӑлт верты питсы па 2020-мит одн сухуптӑды. Щи мӑр лекшитты хотӑтн информатизация немуп вер лӑщӑтды па мӑшӑң ӗх электронной карта-янт вердыт. «Интум информационной тӑхи щирн мӑшӑң мир

верӑт нух хӑншдыт. Тӑм ванӑн ши ӗх непекӑт пӑльницайт эвӑлт электронной щирн «Бюро медико-социальной экспертизы» немуп хота китсыйт», – лупӑс ши не.

Труд па занятасть немуп департамент кӑща лӑңкӑр не **Светлана Лотова** ай павтӑс, муй вӱрн рӑпитты вӑнлат ӗх па инвалидӑт вӑлупсы вӑньльды. Щи вер вӱрӑнӑн арсыр поступсӑт нух вантсыйт па нух нӑтты непек хӑншсы. Шӑдта ши олӑнӑн профсоюзной тӑхета непек китсы. Щи тумпи социально-экономической тӑхи мирхотн лерамтсы, хутысаты предпенсионной немуп ӗх вӑньльты. Нумӑс павӑтсы, лӑдн профсоюзӑт па трехсторонний немуп тӑхет ищи ши ӗха ат нӑтлӑт.

Социальной раз- свития департамент рӑпатнек **Элона Архипова** ясӑң щирн, вӑнлат ӗх вӑлупсы тӱңширӑна лӑщӑтты «Организация, доброджелательная к пожилым людям» немуп тӑхет версыйт. Ӓхӑт щитӑт олӑнӑн поступсы хӑншды. Ищи ши хот кӑща лӑңкӑр хуята вӑдты не

Тереза Пономарѐва мирхотн путӑртӑс, муй щирн 2018-мит одн Координационной совет хуятӑт рӑпитсӑт, лӑдн пирӑщ ӗха нӑтты. Лӱв ясӑңӑл щирн, ол мӑр ши мира «Портал социальных услуг Югры» немуп тӑхийн айкелӑң тӑхи версы. Шӑдта уша павӑтсы, муй нумӑсн ши хуятӑт вӑлдӑт. Щи тухӑлпи нял щирн вӑнлат ӗха нӑтты вер лӑщӑтсы, щит юдн, рӱтыщӑты хотӑтн, мультидисциплинарной немуп тӑхет па нӑтӑсты неӑт унтасн. Щи не путӑр эвӑлт уша йис, 2018-мит олн ар вӑнлат ӗх волонтера йисӑт. «Тӑм пӱш пирӑщ ӗх ГТО немуп Всероссийской физкультурно-оздоровительной вера вӱянтыйдсӑт. Щи тумпи дыв компьютерной многоборье немуп верн кӑссӑт», – лупӑс Т. Пономарева. Мирхот сухӑнтты едпийн щӑта омсум ӗха лупӑс: «Мӱңева пирӑщ ӗх вӑлупсы тӑса лӑщӑтты мосл, лӑдн дыведа ӑмӑщ па ям вӑдты ат йис».

Реональда ОЛЬЗИНА

Иса округ вошәт шуши тәхета адыты рәхл?

Ван хәтлуп тыдәшн округ губернатор дән-кәр хә Алексей Шипилов шуши мир вәлупсы вантман тәйты комиссия ех мирхот әктыдәс.

Сырья кәшайт Спутәртсәт, муйсәр мұвтед мир вәйтантупсәт 2019-мит одн дәшәтдыйт. Югра мұв оса тәхет верәт тәты департамент кәша дән-кәр не **Инна Арканова** айкел тәс, хуты 2019-мит одн увәс мир пәта Мұвтед няд вәйтантупсы нух хәншман вәд:

1. Финно-угорской мир Консультативной тәхи ех мирхот. Тәм тәхи 1992-мит одн пүншсы, дәдн финно-угорской мирәт рәт яснәт па иса культура вәлупсы дерамтты па елды шавиман тәты.

2. Кашән од төвийн па хоң пеләк США мұвн Нью-Йорк вошн иса мұвәтн вәдты шуши мирәт вән мирхота әктәшәйдәт. Шәта ООН тәхийн шуши мир верәт әхтәйн рәпитты хот вәд. Ияха вәйтантум ех сыр-сыр шуши мирәт нұшайт оләңән пүтәртләт.

3. Югра мұв Кев юханәт хұват «От истока к устью» немпи VII экспедиция дәшәтды. Тәм вер 2011-мит од вұш эвәдт «Югра дьднүптәты» па «Ямал – потомкам» оса тәхенән унтасн верды, дәдн яма вантты, муй ширн мұвев-йиңкев оләңән уша верты па дерамтты, сыстам муй әнтә ши мұв. Ши тумпийн ияха катләсман этнотуризм вер түнширәңа дәшәтты.

4. Вухаль мир поэт Ю.Н. Шесталов немпи кәсупсы. Юван Шесталов немпи вухән мойлупсы немасыя Югра мұвев

кәшайтн 2012-мит одн версы. Мойлупсы тәп ши хуятәта мәды, мәтайт рәт мир яснел, литератураед па йис пүтрәт-моньшәт, шуши хуятәт вәдты-ходты ширәт сәмәңа тәйләт па тәса елды тәдәт.

Ши тумпийн Югра мұв шуши мирәт Ассамблея кәша хә **Еремей Айпин** дәнхас, дәдн тәм верәт тумпийн мұвтед финно-угорской писателәт вәйтантупсы иши нух ат хәншсы. Вантә, финно-угорской яснәтн киникайт хәншты ех вәйтантупсы тәм одн Румыния мұвн дәшәтды. Мосл, дәдн Югра мұв писателәт шивмәнты иши ат веритсәт.

Елды Югра мұв районәт па вошәт, хута ар пеләк увәс мирлұв вәдләт, поступсы йилпатты вер оләңән пүтәртсы. Вантә, хәнты пурәйн Югра мұв иса районәт па вошәт немасыя поступсыйн нух хәншман вәсәт. Ши пурәйн кашән тәхийн вәдты мирлұва вой-хұд вәдпәсдәты, вүдәт лавәдты, йис верәт елды тәты кеншәк вәс.

Емвошән округ дума депутат хә **Александр Новыхов** ши вер оләңән шиты лупәс:

– *Юхи хәшум ян од увәс хуятлұв Югра мұв губернатор хуца немасыя вохты пищмайт хәншдәт, дәдн мұвевн вәдты районәт па вошәт оләңән поступсы йилпатты. Вантә, тәмхәтл ар пеләк вошәт, хута ям арат шуши мир вәд, округ поступсыйн шуши*



тәхета ән дундәт. Муй шиты? Шит пәта интәм кашән муниципальной тәхет кәшайта тәса нух вантты мосл, муй арат шуши мир вәд, муй арат хәннехә вәнт шушийн вүдәт лавәләд, вой-хұд вәдпәсдәты ех иши дүнәтты, йис верәт лерамтты увәс хуятәт оләңән иши уша павәтты. Тәм ширәт ияха әкәтты, тәп ши юпийн округ поступсы йилпатты рәхл. Тәмхәтл мирхотн мұң күтәвн пүтәртсүв,

А. Новыхов:
«Тәмхәтл ар пеләк вошәт, хута ям арат шуши мир вәд, округ поступсыйн шуши тәхета ән дундәт. Нәмәслум, хуты тәм вер тәп Федеральной ширн нух вантты па йилпатты рәхл.»

нәмәслум, хуты тәм вер тәп Федеральной ширн нух вантты па йилпатты рәхл. Югра мұвев вән, шит пәты яма уша павәтты мосл, муйсәр утәт шуши тәхета хәншты рәхл, муйсәр тәхи ән рәхл. Шиты елды Югра мұв вошәт па районәт тәса нух вәнтлұв, дәдн нәмәдт тәхи ад юремәты па шуши тәхета хәншты.

Ма нәмәслум, мет оләң увәс мирлұв иншәсты мосл, яна муй дыв вәдты мұвиел шуши тәхета нух хәншты мосл? Яна муй дыв вән ехлұв партум ширн вәдләт, культураев, йис верәт елды тәдәт? Шәдта кимит вер, шит муниципальной кәша ех эвәдт мосты непекәт әкәтлұв, тәм немасыя поступсы мұң йилпатты веритлұв. Ши пурәйн кашән увәс хәннехә кеншәка вәдты питл, лавәрт суртәт түнматты па па ширәт. Вантә, тәмхәтл Когалым вошн 600-кем шуши хуят вәд. Ар пеләк ех – шит вұды лавәдты хуятлұв. Муй пәта тәм вош округ поступсыйн шуши тәхета ән хәншман? Шәдта Сүмәтвош район Игрим кәрт. Шәта 900 мултас вухаль хуят вәд. Емвошәв ишиты. Тәмхәтл тәта вет шурәс мултас увәс хәннехә вәд па рәпитл. Йистедн вошәв шуши тәхета хәншман вәс. Ин па муй тывәс. Емвош иши шив нух хәншты рәхл. Вантә, тәм вошәт поступсыйн әнтәмәт, шит пәта шуши мирлұв йис ширн вәдты шом ән тәйләт.

Ирина САМСОНОВА

Увас ёх нўшайт тўнматдыйт

Йилдуп од однитум юпийн олаң-мит номерн ма Югра мўв депутат, ханты мир эвэлт вэлты хә Алек-сандр Новьюхов рәпата олаңан төп и пеләк путәр нынана хәншсум. Интәм путрем елды төдем.

– Александр Вячеславович, һаң щиренән, депутат пәта мет вулаң вер щит муй?

– Щит карты әхәлдн яңхты-мәнты әшәт, тухлаң хопәтн пәрляты щирәт, кәртәтн, вошәтн хот войт енмәлды, мў-виевн арсыр детугәт енмәлды, вәнтән вонь-шумутәт, тулхәт, лыптәт па па утәт әкәтты, вой-хүд велпәсләты верәт тәса дэщәтты, вәнтән павәрт юхәт, сәхләт сопаса әктыйдты – щит верәт мет олаңан йил-патты мосл.

Щәлдта округ дуват-тыйн пириты ёх пар-тупсәт щирн мўң ар пе-ләк депутатской вух социальной тәхета, хәтл мәр пушхәт давалды хотәта, әшколайта, әрашты тәхета па па мосты утәта китсүв. Щирн пириты хәтлән Югра мўвн вәлды ми-рева ястум яснәт тәса дэщәтты дәнхалүв, дәлдн яна па тўнматум верәт увас мирлүва нәтупсы па унтас ат тәсәт.

Щәлдта мосл ястәты, мет вулаң вер, мәта ут мўң хәлүм од тўнмат-лүв, щит шуши мир ре-естр вер. Щит тумпи хўд велпәсләты щир. Мосл, дәлдн шуши ёхлүв катра пура иты хўд велпәсләты верн әнтә төп хоттел ёх дапәтты веритсәт, вух ёша павәтты иши дәлдн щир ат тәйсәт. Щит пәта федеральной поступсийн хўд велпәс-ләты вер олаңан хәншум правайт йилпатты мосл. Щит вер интәм вантман тәйләв. Немасыя мир-хотәт дэщәтлүв, шив федеральной кәщайт

вохлүв па путәртлүв, хуты шуши ёхлүв йис-телдн хўд катәлман вәсәт, щит верн дывел ертыйл-ты ән рәхл. Елды вер, щит бюджет эвәлт нема-сыя квотайт вохты па ёша павәтты елпийн яма нәмты мосл, веритлән муй әнтә тәм вән вер дэщәтты? Кашәң утые яма вантсән муй әнтә? Вантә, бюджет эвәлт квота ёша павтум юпийн хәннехә ташәна ән йил, тәта давәрт па тўң рәпа-та верты мосл. Щит пәта квота олаңан поступсы иши йилпатлүв, дәлдн арташты ёха кеншәк уша павәтты вәс, тәм хән-нехә яма веритл муй әнтә щит нәтупсы тўң-щирәна елды дэщәтты.

Тәм ванән Сәрханл мўв хәнтәт дәнхасәт, дәлдн мўң вәнтән тўтьюх әкәтты вер па сырыя нух вантсүв. Вантә, ипүша кашащты непек вўты мосәс, тәп щит юпийн хотн кәр алыты пәта тўтьюх сопаса әкәтты. Мўң тәм вер йилпатсүв. Интәм кашәң шуши хуят непекды вәнтән тўтьюх дэщәтты веритл.

– Александр Вячеславович, муйсәр нўша вер мет давәрт тўнмат-ты вәс?

– Кашәң нўша тўң-мәтты давәрт. Юхи хә-шум оләт мўң вантлүв, хуты ванкүтлы шуши хуят ипүша така лупты мосл, хуты яна па лүв увас хәннехә, яна па лүв йис щирн вәлды веритл: вой-хўд велпәсләты, вўдәт давалды, тўтьюх



А.В.Новьюхов

Ингернет эвәлтүюм хур

әкәтты, нәтупсәт вўты па па верәт пәлтапды елды тәты. Вантә, шуши хуят щимәщ правайт тәйл, щит олаңан Конститу-ция непекн хәншман, төп кәщайта щит олаңан ипүша лупты мосл. Щит пәта мўң сорашәк ре-естр непек дэщәтлүв. Тәм вулаң непек вўлүв ки, ар пеләк нўшайт ләп тәхәрләлүв.

Кимит давәрт вер, щит мосл, дәлдн шуши хуят па ёх күтн вәндтйылды, рәпитты па па верәт тәты ән едемман ве-ритәс. Тәм нўша 1990-2000 оләт эвәлт мәнл. Щит рәпатайды пура вәс. Мирева давәрт вәлды питәс, сыр-сыр социальной нўшайт ара йисәт. Щит пәта сырыя вәндтйылды верәт йил-па нух вантты мосл, дәлдн мўң айлат ёхлүв арсыр тәхетн вәнд-тйылды па елды рәпит-ты щир тәйсәт. Мўң дәнхалүв, дәлдн иса ня-времлүв целевой щирн ат вәндтйылдәсәт. Дәлдн вәндтйылды тәхи ет-шуптум юпийн дыв ән нәмәссәт, мәта тәхийн рәпитты па вәлды. Целевой щирн диплом непек ёша катлуптум юпийн рәт кәртәлдн муй па тәхийн хәлүм од ат рәпитсәт па вәсәт.

Щит пәта мўң муни-ципальной кәщайт пи-ла путәртсүв, дәлдн дыв уша ат версәт, муйсәр рәпата тәхет дывела мет

сырыя мосләт, щит ве-рәта айлат ёхлүв тәрум пәта вәндтәты. Щәлдта нәтупсы вухн, вәлды хотн иши нәтдыт. Ар пўш щит олаңан путәрт-сүв, мирхотәт әкәтсүв. Я щит, тывәс – 2019-мит одн вәндтйылды вер йи-луп щирн мәнты питл. Мўң немасыя перечень непек хәншсүв, мәта верәта мет сырыя ай-лат ёхлүв вәндтәты.

Тәмхәтл карты әхәлдн яңхты хуят, нянь верты хәннехә, кәр омәсты хә, тўт хәритты хуят, ди-зельной станцияйн рә-питты ёх, мир ямәлды па лекщитты неңәт-хәйт па па рәпитты тәхет, мәта утәт мет сырыя кәртәта мосләт. Вантә, мўң айлат ёхлүв щит вера вәндтәты ән питлүв ки, па мўвәт эвәлт ёх юхәтләт па рәпитты питләт. Мўң хуятлүв па щит йирн хәщләт. Нәмәслүм, мўң мўвевн сырыя мўң ёх-лүв ат рәпитсәт.

Дәнхалүв, дәлдн ка-шәң кәртән вошәт иты, муй мосл иса вәс, дәлдн айлат хә муй не әнт яс-тәс, хуты вошн рәт кәрт киньща вәлды ямшәк. Щиты мўң дәнхалүв, дәлдн 2020-мит од вәнты Югра мўв дуваттыйн иса тәхетн интернет яма ат рәпитәс, әраш-ты па культурной тәхет ат вәсәт па иса йилдуп вәлупсы пәта муй мосл, айлат ёх пәта дэщәтты. Щит пурайн ёхлүв рәт кәртәла юхәтләт, рә-питты питләт па кәртән вәлупсы иса яма йил.

А.В. Новьюхов пида ма хўв путәртсум, иса верәт олаңан тәта хәнш-ты щир әнтәм. Нәмәслүм, лүв вердал, лүв тўнма-тум шуши мир нўшайт олаңан Югра мўвн вәл-ты мир щиты вәдәт.

Ирина САМСОНОВА

Шуши мир нявремат вэнлтаты оланан путартсы

Ван хатлуп тыдэщн округ вэнлтаты па айдат ёх верат тэты департамент кэща хэ А.А. Дренин шуши мир яснат па вэлупсы лавалты верат тэты научно-координационной совет ёх мирхот верантас. Щата ай тэсы, муй щирн 2018-мит ол мър совет ёх рэпитсат.

Мирхотн округ губернатор дэңкър хэя нётты не Н.В. Савина, округ дума депутат хэ А.В. Новьюхов, округ вэнлтаты ёх институт кэща не Г.В. Дивеева, шуши мир вэнлтаты вер вантман тайты не Н.Б. Костылева, совет хуятат па мойң ёх вэсат. Щата няд вер нух вантсы.

«Институт развития образования» тэхийн психолого-педагогической нётупсэт тэты центр вэл, ши тэхи кэща не **И. Журавлёва** ай тэс, муй щирн дыв шуши мир нявремат пида рэпитлат:

– Ван хатлуп тыдэщ

20-мит хатд вэнты 336 мэшяң шуши мир няврем нух вантсүв, щит кат процент арат иса округ мэшяң нявремат эвалт. Югра мўвн 16 131 мэшяң няврем вэл. Юхи хэшум хэлум ол мър 107 шуши няврем мэшяңа йисат. 2015-мит олн 229 мэшяң эви-пух вэс. Муй пата аршак мэшяң хуята йис? Вантэ, юхи хэшум олгн анкэт-ащет вохты питсат, дэлн нявремдал нух ат вантсүв. Ши тумпи пэдьницаитн нух вантты йилуп пурмасат вэллат.

«Институт развития образования» хуща учебно-методической рэпата тэты кэща дэң-

кър хэ **С. Слинкин** айкел тэс, хутыса дыв там олн округ ашкола-интернатат нух вантсат па нявремат иньщасат, яма муй антэ дыв вэнлталыйт па муй щирн интернататн вэллат. Сүматвош, Нуви сэнхум, Кондинской, Манстър, Нижневартонской, Сэрханл па Ёмвош районат хуватыйн 18 ашкола-интернат хуща вэсат па вантсат. Арталаты ёх уша версат, хуты ши тэхетн ашколаитн нявремат рэт яснат вэнлталат па шуши мир вэлупсы оланан уша верлат, арсыр йис верата вэнлтыйллат. «Институт развития образования» ёх нявремат вэнлтаты па вантман тайты хуятат пата рэт яснат па шуши мир верата тэты урокат тэса лэщатты щира немасыя киника лэщатсат. Ши киника

электронной щирн округ вэнлтаты вер тэты институт сайт хуща «Библиотека» раздел тэхийн вэл. Ши тумпи округ 14 ашкола-интернатн вэнлтыйлдыт па вэлты 109 эви-пух иньщассы, мэстэд дывела муй антэ, муй щирн дыв рэт ясната вэнлталыйт па муй щирн интернататн вэллат. Ши тумпи ши оланан 59 аңки-ащи иньщассы. Уша йис, нявремата па аңкета-ащета иса мэстэд.

Мирхот пурайн итэх кэщайт путартсат, муй верты мосд рэт ясната па шуши мир вэнлтаты верат щирн. Ши тухалпи мирхотн протокол непека ханшы, шуши мир яснат па вэлупсы лавалты верат тэты научно-координационной совет ёх 2019-мит олн муй верты питлат.

Людмила ШУЛЬГИНА

Сүматвош район тащ

«Товары земли Югорской» немпи ванлупсыйн ма Сүматвош район кэща хэ Владимир Иванович Фомин пида вэйтантыйлдсум па иньщасум, муйсър тэхет дыв районэд эвалт ванлупсыя юхтыйлсат па муй тэсат?

Лүв юхлы лупас:

– Ванлупсыя «Рахтынья», «Элаль», «Рутил», «Саранпаульской» немпи вўдең тэхи, Сүматвош межрайпотребсоюз немпи тэхет ёх юхтыйлсат па летут, щит вўды нюхи, арсыр хўлат, воньшумутат, нохър семат, тулхат, ши тумпи вўды кепд эвалт ёнтум пуркайт, хўд па вўды сух эвалт ёнтум арсыр хурамаң пурмасат па па угат тэсат. «Рутил» немпи тэхи ёх кварц па па арсыр кеват эвалт сыр-сыр хурамаң пурмасат верлат.

Ванлупсы пурайн мўн Сэрханл район и тэхи ёх пида вэйтантыйлсүв, и нумса юхатсүв, елды ияха рэпитты.

Мўн Сүматвош районэв 24 кэрт эвалт воньшумутат, нохър семат, тулхат ияха акатты дэңхалўв. Щит шеңк лаварт, щирн ин нэмаслўв, муй щирн щит верты.

Сүматвош районэвн мир семхўд шеңк мосман тайл. Ин ши хўд антэм, худыева тынысэв.

Кашаң ол мўн районэва ар мойң ёх юхтыйллат. Дывела Кев хуща яңхты мостэд.



В.И. Фомин ёх күтн

Ма иньщасум, «Сибирская рыба» тэхи хуты йис? Юхлы В.И. Фомин лупас:

– «Сибирская рыба» немпи хўдаң тэхи ин аң рэпитл. Манум лўнаң сот мудтас тонна арат

хўд велпэсласы. Ин округ правительства ёха па Сүматвош район кэщайта лупсы, мосаң, ешавал «Сибирская рыба» тэхи дэтды.

Людмила ГУРЬЕВА

Рәт мұвев сәмәңә тәйтә нәтл

Сұмәтвош район кўтуп ашколайн Елена Николаевна Ясинская арсыр классәң айдат әх рўщ ясаңа па литература вәндтуман рәпитлд. Лўв 1976-мит одн Ивановской государственной университет етшуптәс. Ханты-Мансийской округ мұвевн иса 1987-мит од вўш эвәлт нывремәт вәндтәд. Сұмәтвош кўтуп ашколайн айдат әх вәндтәты 1995-мит од вўш эвәлт питәс. Щиты 23 од лўв тәта вәд па рәпитлд.

Елена Николаевна Арсыр классәтн вәдты пухәта па эвета рўщ ясаң па литература тәты тумпийн нывремәт рәт мұвев сәмәңә тәйтә вәндтәд. Рўщ щирн ки лупты, щит краеведения немуп верәта лўв айтелдн ашколая яңхты пухәт па эвет немасыя вәндтәты катләсәс.

Хән мин яха вәйтәнтсумн па путәртсумн, лўв иса тәмиты щи мәнәма лупәс, муй щирн ашколая рәпитты юхтәс, иса щи вўшәт эвәлт краеведения верәт олаңән сыр-сыр классәтн вәндтәйтә айдат пухәт па эвет пида путремәты пиньщәс. Әхәт, Сұмәтвош район кўтуп ашколая рәпитты юхәтмәдн, сырыя айдат әхләд пида путәртәс па яма уша верәс, мәта хоттелд хуятәт эвәлт дыв тәм нуви тәрум илпия юхәтсәт. Щәлдә Елена Николаевна партәс пухәта па эвета, ләдн сырыя уша павтум верәт дыв непека нух ат хәншсәт. Вантә, щи пурайн тәса па ямсыева вәйтты питләт, муйсәр рәт дерәт эвәлт дыв аңкидал муй ащидәл тывсәт. Елды лўв иса щимәщ айкел нывремәта верәс, муй щирн рәта-щира лўңтәсты хәннехуятәт тывсәт, муй щирн па хуты дыв рәт дерләд аршәка па вәна йиты питсәт па дәкки тәм вәдты-холты мұвев хўваттәйн мәнты керләсәт. Муй щирн и хәннех рәт хуятәт эвәлт кимит рәт әх тывсәт па тәм увәс мұвн иса



Е.Н. Ясинская

В.Енов верум хур

худыева елды щимәщ вәлупсы щирәт ләщәтсәт. Кашәң хоттелд әх, вантә, лўв хурасәдн тәм Югра мұвева юхтәс па тәта лўв рәт дерләд так-нупсәт па елды мәнсәт.

«Ма әнтә тәп вәндтәйтә классем пида краеведения верәт ләщәтсум, – лупәс Елена Николаевна, – ма щи тумпийн арсыр классәтн вәдты айдат хәннехуятәт пида иса щимәщ верәт йилпатты щирн рәпитсум».

Лўв ясаңдал щирн, дсырыя ветмит классән вәндтәйтә нывремәт пида рәт дерәң юх олаңән ямкем хўв путремәсәт па әхәт класс хуши вәдты сохәд эвәлт рәт юх щурәтсәт, мәта ут илпийн кашәң хә муй не ныврем шатәщәщәд па щәщәд ими, аңкел муй ащәд немәт ямсыева непека нух хәншсәт. Щиты, вантә, айдат әх соращәк уша павәтләт, муйсәр дыв рәтәд па муй хурасуп тәхи эвәлт щи хуятәт катра пурайн тәм увәс мұва юхәтсәт.

Щәлдә, хән рўщ ясаң вәндтәты щирн арсыр урокәт дыв пиләдә Елена Николаевна ләщәтәс, щи пурайн лўв немасыя партәс нывремәта сыр-сыр путрәт хәншты, щит щимәщ нем тәйтә утәт: «Щәщәд ими әшәңәң», «Мўң хоттелд әхлўв хә әх», «Ям па вешкәт аңкем олаңәң». Щиты айдтыева ашколая яңхты нывремәт вәндтәты кўтн краеведения щирн мәнты верәта кашәң од мәр хушдыйт.

Щәлдә нывремәт вәндтәты не путәртәс, хути лўв хушәдә хәтмит класс пухәт па эвет сырыя мәнум оләтн иса шуши мирәт хот йита урокәд етшуптәты щосәтн яңхсәт. Щи тәхийн дыв имудты хәтәдн Сұмәтвошн вәдты поэт хә Вячеслав Шивырталов пида литературной вәйтәнтсупсы версәт. Щи пурайн айдат әх хәләнтсәт, муй хурасуп стихәт па муйсәр верәт олаңәң поэт хә хән-

шәс. Әхәт иши шуши мирәт тәхийн рўщәтәты хәтләтн вәндтәты нывремәт пўпи якты хот хурасәт ияха әктәщум вошәң мир елпийн вәндтәсәт. Елена Николаевна ясаңт щирн, Сұмәтвошәң шуши мирәт хот йитн дыв нывремәдә иса арсыр әш верәтн мулдты ай пурмәсыет верты тәхия яңхсәт. Пухәт юх пурмәсәт ләщәтсәт, эвет сәк пида рәпитсәт па акань әнтәты вәндтәсыйт. Дыв вәндтәты неңәд ясаңәтн, щит краеведения щирн мет вән унтас.

«Ма ашколайн вәндтәйтә айдат әх дыв рәт мұвев мет сәмәңә тәйтә вәндтәдум», – щиты Елена Николаевна мәнәма лупәс. Елды лўв тәмәщ айкел верәс, хути краеведения щирн мет яма хәншум лўңтупсәт дыв районән верум айдат әх мирхотн «От краеведения к краелюбию» вантәләт. Щи мирхотн ашколайн вәндтәйтә пухәт па эвет дыв хоттелд әхләд, ашколаелдн сырыя вәндтылум па вән хәннехуятәта ювум әх олаңәң әмәщ путрәт ләщәтләт. Щиты тәта мосванәң «Тухләң Увәс мұв» литературной кәсупсыйн, мәта ут районной газета хуши мәнәс, ашколайн вәндтәйтә нывремәт кәссәт па иса нух питсәт. Щит дыв вәндтәты неңәд ясаңт щирн, ищиты шеңк вудаң па вера мосты рәпата краеведения елды тәты щирн.

Тәм йисн айдат әх рәт мұвев сәмәңә па ямсыева елды тәйтә давәрт вәндтәты. Щит Сұмәтвошн ашкола нывремәт краеведения верәта Елена Николаевна Ясинская тўңщирәңә па тәса вәндтәд.

Владимир ЕНОВ



Н. Краснопеева лапи верл.
Югра-Экспо хот. 2017-мит ол



Н. Краснопеева «Торум Маа» музейн.
2013-мит ол

Р. Ользина верум хурдн

Мирев вэлупсы ванлтаты – щит шеңк ям вер

«Торум Маа» музей рэпатнекәт кашаң ол «Югра Тур» немуп ванлтупсыи шуши мир пурмәсәт ванлтәләт па хәннехәйт щитәт верты вәндтәләт. Илатн щи ванлтупсыи Наталья Краснопеева пида вөйтәнтсум, щит научно-исследовательской па методической немуп тәхи ух не. Югра-Экспо хотн лүв мира «Времена года. Летние ремесла обских угров» немуп ванлтупсыи шуши пурмәсәт олаңән ай павтәс па мойң ех лапи верты вәндтәс. Щитл верталд мәр рәпатайл олаңән путремәсмән.

– Тата арсыр туристической тәхет эвәлт хәннехәйт вәлдәт, щи еха музейе олаңән ай павәтлүв. Щи юпийн аршәк хуят «Торум Маа» хуши юхтәйлдәт.

– Муй имухты мойң ех ара йил?

– Аңтә. Хән Ас угрәт олаңән мира путәртлүв, ивәнтлы луплүв, хута музейе омәсл. Хуйтат щит ән вәләт, әхәт ищи-па мүйн хушева йилдәт. Юхи хәшум оләтн ар хуят рүтьщәты хәтләтн па көртәт, вошәт эвәлт Емвош вантты па музейе яңхтыя юхтәйлдәт. Итәт лупләт, хәс ол юхды тәта вәсәт. Лыв мәремәлийт, щит пәты вошев вантты тыв йилдәт па музейе яңхты дәнхаләт. Итәх мойң ех группа пида щив мәнләт. Айлат ех күтн ар хуят нявремәлд пида вәлдәләт. Итәхәт лыв эвидала па пух-лада музей олаңән ай павәтләт. Вәнтәв ху-

рамәң па сыстам. Тәдн па лүңән щәта ләңкет хәхәтләдәт. Ех лупләт, вухсарәт щәта ищи вантсәт. Щәта омәсты хәнты па вухалд хотәт яма вантәсләт, нюр щә-та хәннехәйт вәлдәт, тәп мойң ех йиты пурәйн худтпелы мәнсәт. Щирн, ма ванттемн ар хуята «Торум Маа» вантты әмәщ.

Ванлтупсәт тухәдпи хәннехәйт музейе сайтән уша верләт, муйсәр мирхотәт мүйн хушева питләт, ләдн әхәт щив яңхты. Мет ар хуят юхтәйл, хән щитәт сәңхумн верәнтлүв. Лүңән ищи ар хуят вәдләд. Ипүш ай кер тыләщн Югорской долина немуп мүйн семинар версүв. Щи тәхи вош эвәлт шеңк хүйн вәл, щит пәты хәннехәйта щив яңхты давәрт.

– Муй нумәсн пасыр яснуп мира хәнты вәлупсы олаңән путәртлән?

– Мәнема музейной пурмәсәт мойң еха ванлтәты па дыведа альты әмәщ: мүйн – хәнтәт – тәмщәт, ма тәмәщ – Сүмәтвош хәнты. Хуятәт дәнхаләт ки, дыведа ванлтупсыи вәлты пурмәсәт олаңән ай павәтлүв. Щит унтасн дыв уша верләт, муй мүйн вәлүв. Ма нәмәслум, Санкт-Петербург вошн вәндтәйлдсум, ләдн мән-нем мира ванлтәты па хәнтәт вәлупсы олаңән тәсыева ай павәтты. Ма иса ән елемтлум па мосты щирн хәнты па вухалд музей олаңән путәртлум. Юращман мирев культура па опращлүв вәлупсы олаңән ай павәтлум. Щит пәты мәнема ям рәпитты, экскурсияйт нумсәң непекәт па рәт мирем вәлупсы посн верәнтлум. Ма щиремн, обско-угорской мирән олаңән түйңширәна мира путәртлум. Щимәщ нумәсн интум тәта щи

омәслум. Хәннехәйт эвәлт иса ән хәнтяйылдум, хәнты ләмәтсун нух дәмәтлум па ән елемтлум. Муй әрәң опращлам пәты елемты, хуйтат вәнтән па ищи мүйн яма вәсәт? XIX-мит йисн үчәнойт непекәдн хәншсәт, неш хәнтәт ешайн пәрләт. Хута пәрсәт? Сот мудтас ол мәнәс – хәнтәт худна вәлдәт. Ма – хәнты не – вәлдум. Аңқаңкем хәнты щирн вәс, тәп советской лащ питумн лүв йилуп щирн вәс па рәпитәс. Щит пәты Вулаң Отечественной ладь юпийн така рәпитты хуята лүйңтәсәс.

Щикүйш мирев шимл, ищица дәнхалүв, ләдн культураев па хәнты емәңхәтлүв дыләна ат вәсәт. Мүйн интум вәна пеләка йисүв па катра йис вәлупсәва таләслүв. Мосәң, ушәңа-сащәңа йисүв па Найлавн-Вәртлавн вохдаюв. Мосәң, щитлүвн кәшдаюв. Лыв нәдам вәлумн мүйн хушева юхтәйлдәт па мүйнев вәндтәләт, муй лупты па муй верты. Щирн, щиты щи вәдлүв.

Реональда
СУРЕЙСКАЯ

Рэт ёхдал йис верят елды тэл

Лыпат хойты тылащ яртыяңмит хятәдн Тюмень вошн вэлты хәнтэт, вухалят па юрнат Мүвтел шуши мирят емаңхәтлэд постасят. Лыведа арсыр увас ёх, культура па область кәщайт ши верел ләщәтты нәтсәт.

Тюменян К.Я. Лагунов ики немуп киникайт лүңәтты хот йитн немасыя шуши мир хуятәт емаңхәтлэда юхтәйдсәт. Ши пурайн областной правительствa, культура тәхет па арсыр увас ёхлүв оса верят ямәлты кәщайт шуши мирят вәлтыходты шират олаңән тәс айкеләт версәт.

Щәдта тәм емаңхәтлән түңширәңа па вещьката шуши ёх культура верят пида рәпитум хәнтэт па юрнат сыр-сыр ишәкты непекәтн мойләсәйт. Ин мосл лупты, хуты Тюмень мұв финно-угорской культура тәхи кәщая вәлты не Любовь Собянина ямсыева шуши хәннехуятәт пида рәпитал пәта тәм емаңхәтәдн па мойлупсийн катдуптәсы.

Ма лүв пиләда ши емаңхәтл мәнум юпийн немасыя вәйтантылд-сум, вәлупсәд па рәпатайл олаңән путәртсум.

Любовь Дмитриевна ясәт эвәлт уша версум, хуты лүв Түкьякәң кәртән сема питәс па щәта айтелдн вәс па снмәс. Ашколая вәндтәйдты ищиты ши кәртәдн питәс. Эхәт әнкел-ащел китумтак әнтәма йисәңн. Щит пәта хәдмит класс етшуптумал юпийн вән упелдн Ваньшавәт кәрта тәсы. Вантэ, ши пурайн лүв упелд ши кәртән ай тохтура рәпитәс.

Еша эхәтшәк, хән ләпәтмит класс Ваньшавәт ашколайн етшуптәс, упелд хоттел ёхдал пида Тек кәрта касләс.

Ши кәртәдн Любовь Дмитриевна нивәдмит классән вәндтыләс па ши юпийн Светлой воша яртыяңмит па яңмит классән етшуптәты мәнәс. Светлой вошн интернат хуши вәс па күтуп ашколая яңхәс. Хән ши вәндтәты верәл сухнуптәслә, нумәсн юхәтсы Ленинград вошн вәлты увас мирят института елды вәндтәйдты мәнты. Шив питты пәта кимит экзамен лүв ямсыева мәты ән веритәс па шит пәта юхды пелды юхтәс.

Ши пурайн 1980-мит од мәнәс. Юхи юхәтмәдн Любовь Дмитриевна нәмәсты питәс: института ән ки веритәс мәнты, мосәң, мәтты ямшәк училищая елды вәндтәйдты питты рәхл. Щит пәта юдн сыр-сыр айкеләң непекәт түңширәңа лүңтәс па уша верәс, хуты Ёмвошн вәлты педучилищайн вәндтәйдты пухәт муй эвет и тылащ мәр 30 шойт вухән сухуптәйдты, Пулңавәт вошн – иши арааткем. Лүв ширәдн, щит шеңк шимл вәс. Щәлдта иса Тюмень вошәң арсыр вәндтәты тәхет олаңән айкеләт лүңәтты вүянтәс. Шимәщ газета айкел лүңтупсы күтн имултәйн лүв семәл вүша питәс, хуты Тюмень хуши 16-мит ГПТУ немуп тәхи вәд. Ши училищайн камвольно-суконной комбинат немуп тәхийн лаборант шира ямсыева вәндтәйдты рәхл. Шимәщ вулаң вертумпийн вәндтәйдты



Л.Д. Собянина верәнтты неңәт ёнтум пурмәсәт арталәл

айдат ёх тылащ мәр 70 шойт вухн сухуптәйдты па күтуп ашколайт етшуптум нявремәт худыева тәп илем од ши тәхийн арсыр мосты верәта вәндтәйдты.

Любовь Дмитриевна елды лупәс мәнәма, муй ширн лүв ши училищая юхтәс па елды вәндтәйдты питәс. 1981-мит од вүш эвәлт Тюмень вош камвольно-суконной комбинат тәхийн лаборант не ширн рәпитты питәс. Кашәң вер иса вещьката па тәса ләщәтәс па рәпатайл шеңк сәмәңа тәйсәлә. Ош пүнәт ямсыева ләщәтәс, ләдн машина питты елпийн немасыя ши тәхийн рәпитум хәннехуятәтн ат сыстамтәсәйт па лыв күдатләд ващшәка верман ат вәсәт. Тәп ши щос пурайн, вантэ, ям па так нәй сухәт пүн эвәлт тывты веритләт. Щиты иса 1981-мит од вүш эвәлт па 1997-мит од вәнты тәм хәнты не нәй сухәт верты комбинат хуши химикотехнической лаборант шира вәс па араателдн 16 од мәр түңширәңа па вещьката ши тәхелдн рәпитәс.

Елды ма иньшмәсем лүвед, муй

ширн па хән нумәс верәс шуши мир культура верят хуши рәпата мушәтты. Лүв шимәщ вер олаңән мәнәма юхды пелә тәмиты лупәс, хуты имулты вән мирхотн «Комитет по делам национальностей Тюменской области» немуп тәхийн рәпитум Галина Проскурякова пида вәйтантыләс. Ши пурайн лүв унтасәдн Любовь Дмитриевна вошәң хәнтәт, вухалят па юрнат яма вәйтты питәс. Ши неңәдн хушсы культура Центр хуши финно-угрәт оса тәхийн йилуп рәпата лүведа мушәтты. Щиты 1997-мит од вүш эвәлт па ин тәмхәтл вәнты Любовь Дмитриевна шуши мирят культура пида рәпитты вүянтәс. Тәмәщ вер верты питмәл кемн лүв заочной ширн РГПУ им. А.И. Герцена культуролог ширн етшуптәс. Лүв 21-мит од шуши мирят культура хуши вәд па рәпитл.

Любовь Дмитриевна лупәс, хуты ям па арсыр хәннехуятәта мосты рәпата тәйл. Щит пәта рәт мирәд вәлупсы шират ванлдуман рәпитл.

Владимир ЕНОВ

Айлат хуятата нэтты мосд

Щиты лупас Галина Русмиленко, дүв 2008-мит од вүш эвэлт Нуви сәнхум вошн пельницайн инфекционной отделения хуца ай леккар неңа рәпитл. Лүв мәнема вәдупсәд па рәпатайд олаңан айкед тәс.

Тәм ханты не Нуви сәнхум район Ваньщават кәртән вән ханты семьяйн сема питәс. Аңкед – Людмила Григорьевна (эви опраш немд Яврова), ащед – Леонид Борисович Русмиленкайңан сыры Ваньщават кәртән вәсңән па рәпитсәңән. Хәт эви енмәлтсәңән. Хән эвидал вәна йисәт, рәпитты питсәт, дын Нуви сәнхум воша касәлсәңән. Ин щәта рәпитләнән па эвидала хиләт енмәлты нәтләнән.

Галина 2005-мит одн Ваньщават кәртән ашколайн 11 класс етшуптәс па елды Ёмвоша медицинской училищя вәндтәйтты мәнәс. «Олаңмит од вәндтәйтты давәрт вәс. Аңкем-ащем хуши сәмемн талсаюм. Анатомия экзамен давәрт мәтты вәс. Щи юпийн кеншәка йис. 2008-мит одн диплом

непек еша холумтсум», – вәндтәйтты пурайд олаңан лупас Галина Леонидовна.

Щи юпийн дүв Нуви сәнхум воша юхтәс, пәльницая рәпата кәншты мәнәс па имухты инфекционной отделения лекшитты ай неңа рәпитты вүсы. Щи олаңан дүв щиты путәртәс: «Рәпатая ма Валентина Филипповна Андреевайн вүсыюм, дүв щи пурайн пәльница кәщяя вәс. Олаңмит од мәр давәрт рәпитты вәс. Ар пүш щи рәпата вүщкәты нумәсн юхтәйтсыюм. Мәнема щи пурайн Татьяна Ивановна Громова нәтәс, вән пәмашипа дүведа лупты ләнхалум, щит вәщкат па ям не. Тәп ин дүв ән рәпитл, па воша касләс. Ма рәпатаем щимәщ – хәтл мәр 12 щос рәпитлүм, кәт хәтл мәр рәпитлүм, кәт хәтл рүтьщәлүм. Мә-



Галина Русмиленко эвидал пида Ваньщават кәртән 2018-мит одн



Галина «Увас хурамат» якты-ариты ех пида

шәң хуятата пуртәнәт лоньщтәлүм, дывәт пелды вантлүм, муй мосд дыведа, нәтлүм. Итәх пурайн ат мәр рәпитлүм. Ин рәпатаем мосман тәйтлем. Ма пидама ям неңәт рәпитләт. Айлат эвет тыв рәпитты юхәтләт, ма дыведа иса нәтлүм. Ма вәдем, айлат хуятата олаңмит пурайн давәрт рәпитты, дыведа нәтты мосд па иса верәта вәндтәты. Еша рәпитләт па ищиты иса верәт вәты питләт. Ма щиремн, кашәң рәпатайн щиты вәд. Ма айдата вәлмемн тәта итәх неңәт ма пидама щиты путәртсәт, хуты ма иса вәдем па ар од мәр щиты рәпитсум. Щирн давәрта вәс».

Галина Ёмвошн вәндтәйтлмәлдн икия мәнәс, щит рүщ хә Павел Леонидович Бацанов. Дүв Манстәр район Приобье

вошн енмәс. Дын хәлүм эви енмәлтләнән. Ангелина вән эвән ин яң ола йис, Лена кимит эвән хәт ола йис. Катя ай эвән 2017-мит одн сема питәс. Икед вошәң өшәт ләщәтман рәпитл.

Мосд лупты, Галә айлат пура вүш эвәлт ханты якәт якәд. Дүв олаңдн «Түтые» якты-ариты тәхия яңхәс, щәлтә 2009-мит од вүш эвәлт Нуви сәнхум вошн «Увас хурамат» тәхи ех пида арсыр емәңхәтләтн ханты якәт якәс. Ин эвәңәд щи верә вәндтәд. Ям, хуты эвидал ай пура вүш эвәлт шуши мирев культура вәйтләт. Ма ләнхалум Галина Леонидовная па дүв хәтәң ехләда яма, уяңа, тәлаңа вәдты!

Надежда
РАГИМОВА



Галина Русмиленко эвидал пида Нуви сәнхум вошн хурамәң коляскайт күтн кәсупсәйин

Катра хотэв олаңан

Там йисн катра верат каншты питсайт. Щит шеңк ям. Мўн вун хоятат ан ки питлўв опраш верат олаңан пётартты, худца ай няврэмат йис верат вуйтты питлалдал. Там пётрэм манл йис хот олаңан. Щит ма опрашем омсом хот.

Там хот хўв пўраин омасса. Щи пўраин опрашем па щашем велщи яха мансаңан. Щи верат 1920-мет молтас талдат пураин вусат. Новьюховат Вошрэн ов куртэн вусат. Олаңан там хот тата щи омасса. Тамиты вер вус. Паварт сэварса ин Тэк куртэв омасты тахайн. Нял пух (Тимофей, вун Михаил, Пётр па ай Михаил) лыв ащел Андрей Семёнович пида рупитмел. Паварт сэвармел па яха ярмел, Ас па пелка довалдмел, овн ныкды пелы павартат тувумат. Вошрэн ов лэпн вўты довалдмел. Щиты щи павартат мосты тахая тувумат. Хот омасты вохальд ёхн нётмел. Щи пўраин Сак элты вохалят там мўнев мухты Вун Аса хўд велдаслаты янхсат. Мўн ёхдав лыв пилэла лухсаңа вусат. Атём турум пўраин вохалят елды манты ан веритмел. Щирн щи мўн ёхдав хуши хоймел па йи лапат тата вудмел

мяр, хот омасты нётмел. Там хотн опрашем нийл няврэмдал сэма питмел, вет няврэмдал вуна ювмел, худом тэпийдал айтэдн антума ювмел.

Хун колхозат верты питсайт, Вошрэн па пелкан Тэк курт омасты питса. Щирн Вошрэн ов курт элты пёсл па пелка хотат тусайт. Опрашем хотд ищи ялбп тахая туслэ. Дяль пўраин опрашем дяля туса па щата Ленинград вун вошн щи паратса. Ёхи ант ёхатдийс. Няврэмийдал щашемн атэлт энмалсайт. Щи пўраин шеңк лаварт вус. Щашем атэлт рупитас, ёдн лўвел самдал вохман вет няврэмдал па пираш сэмды омел лавлассат. Ипўш хун дыв самдал вохман, холдуман ид улдисат. Ай няврэмата энёмты мосас, туп нух энёмты щир антум вус. Няврэмием хольева хаш щи лэлды парсат. Туп щашем хуйд хаем хотн молты щирн няврэмдал

хольева энмалсәлдэ. Ёхат па тата, кўтлуп Тэки, кат хилнәңәл сэма питсаңан. Щит Лиза па Зоя. Савва хилдәл ищи тата сэма питас.

Ёхат куртэв па тахая туса – Ас па пелка, ин омасты тахайла. Хотэв ищи 1958-мет тәдн ялбп тахая туса. Худмет тахелдн инты вунты опрашем омсом хот омәсл. Щата там ван вунты опем семьяил пида вус. Йи хоят хун щата энмас. Опем худом няврэм ищи щата энмәсәт. Мет олта щата энмас опем эви – Олеся (ин лўв Тэки няврэм вундтаты нәңа рупитл). Щашем хуйд шеңк мосман тайсәлдэ, тэпиң пидьел олаңан ар верас. Щи арәдн хотн олаңан тамаш ясәт вудлат:

**«Сөхдыен доңдөп ям хотыел
Турум ващман омсәдытал.
Сөхдыен доңдөп вун хотыел
Этәр ващман омсәдытал».**

Мўн, там хотн энмөм ёх, хотэв мосман тайлэв. Ям пётар пётартлўв па ям ясаң лўв олцелән

ястәлўв. Ма ищи лўв олцелән ар хәншсум.

Катра хотэв олаңан

**Вет дал хўват катра хотыев,
Хут дал хўват мосты хотыев.
Опращев омсом йис хотыев,
Мўнев энмәлтөм сорни хотыев.
Худмет тахайн ин щи вудтал,
Йи хоят хун лўв хошмийдтымал,
Йис вудты щир па ищи вантыилмал,
Дяль шук тувом мирл нөх энмәлтыйдмал.**

**Хотәң ёхдал мосман лўв таймал,
Шукаң ёхдал иса шавимал.
Ин ноптәд пирща иса щи ювмал,
Ин иса вуна тәлдал щи ювмел.**

**Кашәң хәтл мўнев щи лавләл
Па мўн олцевән иса щи нөмсәл
Хуты няврэмат ёхи аңкийн лавәллайт,
Щиты хотэвн мўн вантыдаёв.
Пирәш ишни сәмдалн аңкәрмийл,
Хун мўн этмәлўв, сәмиел хошмал.
Дыләл вудты вунты, мўнев нумләлдэ,
Энмәлтөм ёхдал ант ёрәмәлдэ.**

**«Вун Пумащипа!», – иса ястәлўв, –
«Нөмсән ал шукәшл, нәңен мўн нумлэв.
Энмәлтөм ёхдән иса лавләллўв,
Хўв йисәң-нуптәң дывел миядән».**

Пётрэм щи худас. Ма ләңхалум, лудн ай ёх вун опрашдал, щашилал ат нумләлдал, лыв ям вердал елды ат тулдал.

Зоя НОВЬЮХОВА



Рутдал опращел омсом хот пўңәдн

Эмэщ вер тайлдум

Ван хятлуп тыдэщн Сүмэтвошн Любовь Константиновна Вынгилева пида вейтантыйлдсум. Муй ширн па мата мўватн вөлупсы ширэд манас, муй хурасуп рэпата тайс, щи вердал оланан ма лўвел иньщасты питсем.

– Любовь Константиновна, сырыя нэң ай пура олан, аңкен-ашен муй нэң хоттел ёхлан оланан матты айкел газетаева ханшты пата тўва?

– Ма тата, Сүмэтвошн, сема питсум. Аңкем-ашем китумтак вухальнэ. Ма тумпемн мўң щемьяев хуши вэн упи, и яй, щалта ма па мет ай не апшиев худыева ияха вэсўв па енумсўв. Ёхат ищиты кўтуп ашколаева тата вэндтыйлды янхсўв па щитэв етшуптумев юпийн сыр-сыр тэхета дэки вөлупсы ширлўв лэщатты мансўв. Мўң ащев сырыя Пуднават вош зооветеринарной техникумн ям арат ол мэр вой мэшат ямалты тохтура немасыя вэндтылдэ. Щи вэндтаты тэхел етшуптумад юпийн лўв сырыя 1950-мит олат вўшн Тазовской районан Ямал мўвн совхоз вўды ташатн янхас па вўды мэш верат ямалтыйлман рэпитас. Хэн па лўв не тэс, щи олатн Сүмэтвош района каслас па «Саранпауль-ской» совхозн вўлэт пида рэпитты пиньшас. Ёхат мўң ащев «Ванзетурской» немуп совхоз хуши па ямкем арат ол мэр вэс па рэпата тайс. Щалта лўв 1983-мит одн пенсияя рўтщасты манас. Аңкев па Алтатумп кэртэң не вэс. Лўв 11-мит ода ювмал пурайн велши ашколая вэндтыйлды тэсы. Мосан, щи пата тэп вет класс етшуптас. Ёхат, хэн Пуднават вош медучилищяя вэндтаты вўсы, елды лўведа давэртэңа вэндтыйлды йис. Щит пата лўв щи



Л.К. Вынгилева

верэд хайсалэ па юхи юхтас. Ёхат иса вөлупсы хўватн аңкев Сүмэтвошн тухлан хопат датты тэхийн техслужащий не ширн рэпитас. Рэпатайд шеңк самана тайсалэ па щит пата вэн кэщайтн ищи яма тайсы. Лўв хурал тамхатл вэнтыв авиапредприятие хуши яма рэпитты ёх хурат кўтн ищиты шивалаты рэхл.

– Вухаль вөлупсы ширэпата, алпа, нэң аңкен-ашен катласман вэснэң?

– Кўш мўң вэн вошн сема питсўв па енумсўв, аңкев па ащев иса рэт мирел вөлупсы ширэпата катласыйлман вэснэң. Мўң ащев иса хўд па вой велпэслас. Аңкев ищиты пура-пурайн хўд велпэслаты лўв пилэда янхас. Щалта товийн муй сўсн ащев сыр-сыр васы па лэнтат велад па юхи щи тухлан войт алдэлэ. Мўң па щи хатлатн худыева васы муй лэнт пўнат сэхатман омэслўв. Нэмлем, хэн ащев велпэс эвалт юхаттал юпийн лаңки, шовэр, антатра муй па пасыр вэнт вой сухат нух хурал па соралты щира

лэщатлэлэ. Ёхат аңкевн щи вой сухат ямсыева лустасыйт, таналсыйт па мўнева тайты милат муй посат щитат эвалт ёнтсыйт. Щимэщ тэса ёнтасты верэд тумпийн аңкев ош пун сух эвалт хурамэң вейт тыйты па хошас. Ма щиремн, ин мосл лупты щи вер оланан, хуты 1990-мит олатн, хэн ияха дыв пенсияйн вэснэң, аңкев-ашев рэпатайды иса ан па омэссанан. Дын Сүмэтвош коопзверопромхоз эвалт вўды кеплат вўйляснэң, юдн щи вой сухат ямсыева лустасыйт. Ёхат кеплат иса ёшн тын саты таналсат. Щиты вухаль ширн мўң енумсўв.

– Хута нэң ашколаен юпийн вэндтыйлсан па муйсар тэхийн вэсан па рэпитсан?

– Хэн 1982-мит одн Сүмэтвош кўтуп ашкола етшуптасум, щалта ашкола кэща Виктор Иванович Бурдыгин партас, лэдн ма нявремат рўщ ясаңа па литературе вэндтаты неңа Ленинград воша увас мират факультета вэндтыйлды ат мансум. Ма

иса экзаменат мэсум па щи тэхийн вэндтыйлды питсум.

Хэлум ол мэр вэндтыйлдсум па икия мансум. Щалта икем Чукотка рэт мўва Провидения воша вэлты юхатсумн. Щи тэхийн иса ветмит этаж ширн вэлты хотат щи пурайн омэсыйт. Ширн, мўң матты вэн вошн щата вэсўв. Кимит пелак эвалт Провидение вош щорас хўват янхты вэн тўтанхопат хойты тэхия лўнатсы. Щи тэхийн тал пурайн иса и пўша вотасан хатлат вэлдат, лўнэң па – ар пелак эвалт арсыр вотат пулдат. Ханнехэ лўв вэлты-холты хурасл ищипа тэса лэщатлэлэ. Щит пата ищиты щи мўвн вэлты вэндсум. Ма щи вошн яртъяңмит классан коррекционной ашколайн сырыя хатл мэр нявремат давэлты па щалта рўщ ясаңа айдат ёх вэндтаты неңа яртъяң ол мэр рэпитсум. Ёхат 1997-мит одн хоттел ёхдам пида Сүмэтвоша касалсўв. Тата иса щи вўш эвалт па 2014-мит ол вэнта кўтуп ашколайн нявремат рўщ ясаңа па литературая вэндтасум. Хэн айдат ёх вэндтаты рэпата щирем 26-мит ода йис, пенсияя мансум.

– Сүмэтвош районан шуши мират культура хотн рэпитты верат оланан еша путарта?

– Тата ма кат ол мултас вэлдум. Мўң кашан пурайн арсыр шуши мират еманхатлат посталўв, щит «Вэнлат ёх хатл», «Вурча хатл», «Вурчак хатл», «Тылэщ пори» па арсыр утат. Хантэт па вухалат иса щи пурайн мўң хушева юхтыйлдлат па кашан еманхатл ияха иса яма порилалўв. Ма щиремн, там шуши мират культура хотн шеңк эмэщ па ханнехуятлўва мос-ты рэпата тайлдум.

Владимир ЕНОВ

Ма нэптеммн ясәң ән вәшл

2017-мит одн ван хәтлуп тыләшн «Хәнты ясәң» непекн Эстер Рутткаи-Миклиан пида путәр етәс (<http://www.khanty-yasang.ru/khanty-yasang/no-24-3492/7238>). Шит Антал Регули немуп музея кәщә не Зирц вошн Венгрияйн. Ши непекән А. Регули па ши хә немуп музей олаңән хәншман вәд. Ши хә XIX-мит йисн Увәс мұва обско-угорской ясәңән дерамтты юхтыдәс. Ши юпийн лұв лупәс, хуты щитңән венгерской ясәң пида рәта вәдләңән. Щәдта Эстер ай павтәс, муйсәр музейтн хәнты па вухальд пурмәсәт нух шавиман вәдләт. Тәм хәтл лұв пидада хәнты ясәң олаңән путәртламмн.

Мосд лупты, Э. Рутткаи-Миклиан вет од Ямало-Ненецкой округн Дор вош районән вәс па Сыня мир путәр сувн яма путәртәд. Ши ех эвәлт нух хәншум моньшәт па арәт www.hantisirn.hyud.hu сайта пунсәдлә. Лұв хәнты ясәң дерамтты па арсыр мирхотәта Ёмвош округа ищи юхтыыл, тәняд

VIII-мит Всероссийской Югорской полевой музейной биеннале немуп мирхотн вәс.

– **Нәң нәмәстәнән, пура юхәтл, хән обской угрәт кұтн путрәт па моньшәт вәты хуят иса ән хәшл?**

– Ма щиремн, щит верты иса щир вәд. Сыняйн ма нэптеммн ясәң ән вәшл. Щәта

ма киньщема айшәк хуятәт рәт ясәңән яма путәртләт. Әнт хән, па тәхетн ши вер пасыра вәд. 2009-мит одн ма, Жофия Шён (Ковач) па Ласло Фейеш Ёмвош эвәлт Тек вәнты яңхсүв, арсыр кәртәтн вәсүв. Ши пурайн дерамтсүв, хута мир худна хәнты ясәңән путәртләт. Мұң сыры нәмәссүв, салымской хәнтәт иса ясәңел юремәсәт. Ягурьяхән салымской пирәщ ими Валентина Ефремовна Микурова вәйтсүв, әхәт Жофия лұв пидада рәпиттыя щәта хәшәс. Кұш ши ими яма рәт ясәңәдн ән путәртәд, ищипа итәх ясәңәт нәмләдлә.

Федосья Лельхова вәнтуп шәңәт Ульяна Яковлевна Лельхова Поднавәтн нявремәт вәдтәты неңа вәс. Лұв Кеушки кәрт эвәлт вәс, рәт ясәңән лұв путәр сувәдн путәртәс. Интум щит щирн немхуят ән путәртәд. Шәншвоша юхәтмевн щәта Марфа Зверева пида вәйтәнтсүв, лұв Тек эвәлт вәд, ищи па кәрта касләс. Шеңк яма рәт ясәңәд вәдлә. Мұң Тек путәр сув кәншсүв, лұвәд Шәншвошн вәйтсүв. Щимәщ ех, хуятәт рәт ясәңәдн худна путәртләт па мұвәтн вәдләт, худна ар вәд. Тәрум илпийн вәлупсы тәм йисн иса пасыра йис. Венгерка Сыняйн вәд. Хуятәтн кәншты ки питсыюм, немхуят ләдн нумәсн ән юхәтсы мәнәм Сыняйн

кәншты. Румынияйн па Словакияйн ләдн кәншсыюм, щәта рәтлұв вәдләт. Шит пәты ән мосд нәмәсты, хуты Салым юхан хәнтәт интум вәнты тәп щәта вәдләт. Ищипа амәтлұв, кұш хута, хән щимәщ хуятәт вәйтлұв. Щиты кәртәт хұват яңхман, мұң ар тәхетн хәнты па вухальд ясәңәдн эвәлт арсыр әмәщ верәт уша павәтсүв.

– **Мұң ищи нәмәссүв, кондинской вухалят па нұм мұв хәнтәт хұвн рәт ясәң вәтшәсәт. Уша йис, итәх ех интум вәнты ясәңәд нәмләт.**

– Давәрт щимәщ ех вәйтты, мосәң, интум дыв па мұвәтн вәдләт. Федосья Лельхова (филологической наука кандидат, Обско-угорской институтн рәпитты не) лупәс, дыв хәнты ясәңуп диалектологической непек верты ләңхаләт. Муй щирн щит верты? В.Е. Микурова худта хәншты, лұв интум кұш Салымән ән вәд, ищипа салымской щирн путәртәд? Сынской хәнтәт, хуятәт Ёмвошн па Игримән вәдләт, худта хәншты? Сұмәтвош хәнтәт, хуятәт Сәрханлән вәдләт? Дыв яма рәт ясәңән путәртләт, тәп ики версәт па па мұвәта касәдсәт. Шит эвәлт дыв ән пәрсәт па ясәңәдн ән юремәсәт. Ласло пида Троица па Луговской кәртңәнән кондинской вухалят па касум хәнтәт вәйтсамн. Интум вошәтн ар айлат хәнты па вухальд вәд. Хән әңкидал-ащидал пиршамәлүйт, ищи дывәд щив вәдты тәдәт. Тәм йисн шеңк ар *ил хәнтятум хуятәт* вәдләт. Дывәд вәйтләдн, худсаты ши олаңән ки хәдләд.

Тәм пұляң мұң рұщ ясәңән непек хәншсүв,



Э. Рутткаи-Миклиан па Ш. Дудек, Ёмвош, 2017-мит ол



Е. Хорват, Э. Рутткаи-Миклиан па О. Бубновене, Ёмвош, 2017-мит ол

муй арат хуят кэртэйн рэт ясаңан путэртлэт. 100 хуят ки щата вэл, щитэт эвэлт 24 – щит шуши ёх, рэт ясаңан тэп кат хуят путэртэл: ит – яма, ит – вевтама. Итэх кэртэйн иса немхуят яснел аң вэдэт. Итэт В.Е. Микурова хураспет, хэн дывел иньщасты питлэн, айкемн яснэт нух нэмалматы щит питлэт. Округ хуваттын щимаш хуят ар вэл.

– **Там йисн ар шуши ёх па мўвэйн вэлдэт па арсыр путэр сувэт ияха дылдэты питсэт.**

– Софья Онина па Федосья Лельхова – Сыня юхан хэнтэңан, Ёмвошн хўв вэлдэңан па касум щирн путэртты вэндсэңан. Феня итэх пурайн **опса** юкана **омса** лупал. Сыня юхан хэ ёх Куноват, Ас, Мужа па Шурышкары эвэлт ими версэт. Ёмаш вантты, муй щирн па мўв эвэлт каслум неңэт па путэр сувн путэртты вэлдэт. Вантэ, итэх яснэт па хураспет, дыв щитэт аң вэлэд. Хэнтэ Сыня ар вухаль ёх касалсэт, дыв щата иши хэнтэ ясаң нух вэлдтэсэт. Вухаль неңэт нявремдал па хидыдал рэт яснелн и-кэт ар ариты, моньщ муй путэр путэртты вэлдтэсэт. Икидал пила, алпа, дыв тэп хэнтэ ясаңан путэртсэт.

Ма ёхэт немасыя щит олаңан имет иньщасты питсум. И ими Катра вошн лупас: «Хэн икем хуши касалсум, дўв лупас: «Хэнтэ щирн ал путэрта, мирн няхты питлэйн. Наң па щирн путэртлэн. Щит паты рўщ щирн путэрта». Лўв хэдум-няд ол манум юпийн Сыня путэр сувн путэртты вэлдэс, дэлн немхуят дўвела ал лупас, хути юврая путэртэл.

– **Хэн рэт ясаң олаңан путэртлўв, иса луплўв, хути йис щирн путэртты мосл. Мосаң, мўн юврая нэмаслўв?**

– Ясаң мосл, дэлн хэнтэхэйт кўтэдн путэртты щир ат тайсэт. Хэн вэлупсы пасыра йил, щит пурайн ясаң иши па хураспия йил. Аң велем, муй паты нын нартама сот ол хэнтэ вер пида вулкэмалтэн. Хэнтэхэйт, муй щирн ланхалэт, щиты ат хэнтэ дэт. Там йис нявремэт хэнтэ щирн ки хэнтэ дэңхалэт, дыв вэйтлэт, муй щирн хэнтэ: рўщ буквайтн муй пасыр посэтн. Хуйтат рэт ясаңан непекэт лўңэтты каш тайлэт, ишипа мутшэлэт, муй щата хэнтэман. Хэнтэ ясаңан мосл путэртты, путэртты па путэртты. Щалта путэр магнитофона нух хэнтэ мосл. Интум



Э. Руткаи-Миклиан, Ёмвош, 2017-мит ол

Л. Поршнова верум хур

арсыр мўвэйн хэнтэхэйт мет сыры путэртты вэлдтэдыт, тэп ёхэт хэнтэ. Там йисн йилуп щўңкэт унтасн кашаң хуят компьютеран английской па немецкой ясаңан хэлэнтэл па нух вэлдтэл. Интум телевидение, ратива, интернет па YouTube вэлдэт, щитэт унтасн иши хэнтэ ясаңан путэртты рэхл. Каш ванлэтты хушапэйн рўщэт ити передачайт верты мосл, щалта айлат хэнтэт дывела мэтэты щирн передачайт ат верлэт. Там йисн эвет па пухэт телевиденияйн «хэса» вэлты дэңхалэт. Дывела нэтты мосл, дэлн щимаш хуятата ат йисэт. Интум вэнт кэртэйн па ай кэртэйн рэт ясаң вэты нявремэт худна вэлдэт. Дывел щиты вэлдтэты мосл, дэлн рэт ясаң унтасн дыв непекэң хуята па ям рэпатнека ат йисэт.

– **Щирн, мет олаңан хэнтэхэйт путэртты вэлдтэты мосл?**


– Ма нэмаслум, ясаң дылдэна тайтыя правописание аң мосл. Аңт хэн, рэт ясаңан киникэйт хэнтэ мосл. Мосл нэмты, дэлн рэт ясаң ал вэшэс, щит ясаңан путэртты мосл. Шаль хэнтэ письменность, ар ол нумсаң па вэн непекэң ёх щит вера

ёр пунсэт. Интум вэнтэ ушаңа щит вер аң дэщэтсы.

– **Хэнтэ ясаңан там йис вэлупсы ясаң аңтэм. Ипўш Т.С. Себулова электротут ясаң хэнтэс. Рўщ ясаңа хэнтэ ясаң кэрэтэс па щимаш йилуп ясаң тывэс. Мосаң, щиты йилуп яснэт верты?**

– Па муй, ма щиты йилуп хэнтэ яснэт щит верлум. Хэн Аркадий икем пида Венгрияйн вэлдамэн (икел хэнтэ) ванкўтлы рўщ ясаңан путэртламн. Вантэ, щата вэлупсы иса пасыр па арсыр верэт хэнтэ щирн луптыя ясаң аңтэм. Муй щирн ма хэнтэ ясаңан **счэтчик воды** немуп щўңк адылем па Аркашаема щит олаңан луплум? Щимаш утэт адытыя йилуп яснэт верты мосл. Итэх хэнтэт **самолёт** ясаң **тухлэң хол** щирн адышэлэт, па хэнтэт щимаш ясаң аң тайлэт. Сыняйн пирэщ ёх айлат хуят педы дывэллэт: «Нын **путэртлэты** юкана **говорлэты** луплэйн». Аңт хэн, ям дэлн вэс, хэн дыв тэп **путэртлэты** лупсэт. **Говортлэты** ки луплэт, ишипа щит ясаң хэнтэ щирн сацл. Щит паты хуят **электротут** лупты ки дэңхал, ат щиты лупал.

Реональда ОЛЬЗИНА



С. Ремизов па Э. Руткаи-Миклиан, Ёмвош, 2017-мит ол

Р. Ользина верум хурат



Е. Захаров «Форс-мажор» театр айдаг эх пида

Нявремат па айдаг эх арсыр верата вэнлтыйлдят

Лаңки пос воша яңхемн ма нявремат па айдаг эх рўтыщаты «Фортуна» немпи хота яңхсум па кэща хэ Евгений Захаров пида путартсум.

– Евгений Игоревич, тәм тахи олаңан еша путарга.

– Мет сыры тәм хотн есум ийңк эвәлт арсыр епләң летут верты хот вәс. Щәлта Лаңки пос вош кәщайтн ши хот мўнева мәсы, щәта дыпийн тәса йилпатсы. 2002-мит одн тәндуп тыләщ 12-мит хәтләтн мўң тыв касәдсүв. 2007-мит одн Лаңки вош кәщайт, депутатәт па «Лангепаснефтегаз» немпи тахи кәща эх пида ияха рәпитты олаңан кашашты непек хуца эш посәт пўнсүв. 2011-мит одн айдаг эх тахи кәща пида ияха рәпитты питсүв. Вошәң депутатәт, щурас эх вухн нәтләт арсыр еманхәтләт ләщәтты пәта.

Мўң тәта вет поступсы хўват рәпитлүв, ипуляң нявремат па айдаг эх пәта культура, вәндтәты, тумтака вәлты щира верәт тәлүв.

Мўң хущева арсыр мирәт 13 оса тахи, мир якты-ариты 17 тахи рәпитләт. Ияха лўнәтты ки – вошевн 60 арсыр оса тахи, щит «Первопроходцы», «Ветераны Афганистана» па па тәхет вәлдәт.

Ин тәм хотн тахи ән тәрмәл, щирн ванән омәсты хот ищи

мўнева мәсы, щәта нявремат па айдаг эха рәпата мәты тахи вәл. Ши вер ләщәтты пәта мўң вошәң нявремат вәндтәты вер тәты эх пида рәпитлүв. Ши тумпи ши тахийн хотел эха нәтты хуятәт, щит юрист, социальной рәпатнек па психолог рәпитләт. Ипўш мўң грант нәтупсы вух холумтсүв. Ши вух унтасн рўтыщаты хот йит ләщәтсүв, мосты пурмәсәт па сыр-сыр утәт ләтсүв.

Тәта кәт вән хот йитн арсыр мирәт эх дыв щирәлн мирхотәт, вәндтупсәт, етнхотәт ләщәтләт.

Мўң хущева иса тәм йис мосты пурмәсәт вәлдәт, щирн телемост ләщәтты веритлүв. Щиты ипўш мўң хущева вәлты белорусәт Москва хон вошн вәлты рәт мирел пида путартсәт. Ши тумпи ям арат од юхды па хон пеләк Великобритания мўв әшкола эх пида путартсүв. Ши пурайн англичанәт мўнева Уильям Шекспир хәншум путәр хўват спектакль ләщәтты нәтсәт. Щәлта ши етнхот пәта мўвтел мир театральной фестивалян Гран-при мойлупсы еша холумтсүв. Ши спектакль пида па хон пеләк Мальта мўва яңхсүв па мира альсүв, дывела щит шеңк мәстәс. Па хон пеләк английской ясаңа мўнев Ольга Алексеевна Диянова вәндтәл, лүв вошәң гимназияйн рәпитл.

Ши тумпи па хон пеләк США мўв Эль-Пасо вошәң мир пида вантман путартсүв, дыв мўнева шуши мир вәлупсы олаңан айкел тәсәт, мўң дывела хәнты мир олаңан путартсүв.

Ши тумпи тәта вән телевизорәт хўват вошәң мир пәта футбол юнтупсы чемпионат альсүв.

Мўң хущева айдаг эх арсыр арәт ариты тәхет ләщәтсәт. Ши тумпи ям арат од юхды мўң хущева «Небоскрёбы» немпи ариты тәхи тывәс.

«Форс-мажор» немпи театрән юнтты айдаг эх йилуп спектакль вәндтәты ләщәтләт. Ма дывел етнхот альты вәндтәлүм. Тәм ванән Йилуп од постум пурайн дыв нявремат пәта А.М. Конькова хәншум «Пәлтапды Татьяна» немпи моньщ хўват спектакль альсәт. Ши етнхот пәта мўң йилпа «Образцовой» нем елды тәлүв. Ши етнхот альты пәта мўң сыры грант нәтупсы вух еша холумтсүв. И грант вух унтасн мосты ләмәтсүхәт энтсүв. Кимит грант нәтупсы вух унтасн театрән юнтты эх пәта интернет-фестиваль ләщәтты нумәс тәйлүв. Щәлта нух питум театрәт эх мўң хущева вохты ләңхәлүв, мўң амфитеатр, иса мосты ариты муй альты пурмәсәт тәйлүв, етнхотәт кәтсоткем хуят вантты веритл. Мўң мет яма Мегиян па Когалям вошәңан вәлты театрән эх пида инумәсн рәпитлүв. Ям арат од юхды олаңмит пўш «Навстречу друг другу» немпи театральной еманхәтл ләщәтсүв. Ши пурайн тыв округ вет театр эх юхтәйлсәт па шуши мир йис путрәт, моньщәт хўват етнхотәт альсәт. Щәта мўң ищи Гран-при мойлупсы холумтсүв.

– Евгений Игоревич, еша нәң олаңан путарга.

– Антон вән пухем мўң рәтәв олаңан уша верәс. XVII-мит нәпәт вәнты рәтәв вәйтәс. Мўң рәтәв Конда юхан йис вухаль Сатыга канащ эвәлт йил. Канащ Сатыга – щит мўң опращев. Аңщәцем эви опращ нем Сатыгина вәс. Дыв Сатыга кәртән вәсәт, щит Урай вош пўнәлн вәл. Ши вер олаңан йис непекәт, хурәт вәлдәт.

Антон пухем Санкт-Петербург вошн университет етшуптәс, хот омәсты верн экономика вәндтәс. Кимит Григорий пухем ищи елды университетн вәндтәйл.

Е.И. Захаров пида путартәс
Людмила ГУРЬЕВА

Шәкәң ари нумсем, ма ши хайиялмем


Мәнум од ван хәтлуп тылдың мўң Касум вош эвәлт нявремәт пида Сәрханл району Сытомино па Лямина кәртңәна яңхсўв па «Шәкәң ари нумсем, ма ши хайиялмем» нәмпи етнхот алысўв. Тәм ләщәтум утәв мўң велди па тәхия тәсәв.

Шив хўв әш вәс, тухлән хопн, машинайн, доньщ хўват яңхты карты хопн тәсынов. Ши пәта итәх пурмәслўв шўкаләсәт па шив юхтум юпийн нух ләщәтсәлўв. Ләдн етнхотәв тәс щирн ванлтәты, немасья хот йит мосл, хута лампа тўт хот питрәта мосты щирн хәтләты питл.

Муй оләңән тәм дунтарәв? Щит әнтә тәп хәнты мир йис верәт оләңән, щит иса вәлупсы оләңән. Муй щирн вәлупсы тывәс, муй щирн елды мәнл. «Пелым мўв Тәрум емәң арн» ариды, лўв пухиел – сорни пулыел, хоп эвәлт юхан хонәңа ләрийс па дыкәң вәнт вәя йис. Ащел нәд есләс па ши вәнт вой пәратсы.

Сытомино кәртән етнхот вантум юпийн хәннехуятәт мўң хущева ванемийлсәт, әпәлдмийлсәт, итәх хуятәт сем йиңк нух мәнхсәт, пәмащипа яснәт лупсәт. Дыв путәртсәт, хуты тәмәщ ут худна ән вантсәт, ая вәлум пураел, рәт әхлал нәмәдмәсәт.

Лямина кәртән етнхот әшкола-интернатн версўв. Шив нявремәт па вән хуятәт дунтарәв вантты юхәтсәт. Мўң нәмәссўв, муй щирн нявремәт щит вантты питләт, уш тәйләт, муй әнтә? Олңәдн дыв няхийдсәт, мудты путәртсәт. Щәлдта, хән нарәсты сый па ар сув сащмәс, мәшьяя йисәт, вантты питсәт. Хән етнхотәв етшуптәсәв,



Нявремәта етнхот вантты әмәщ вәс



иньщәссәлўв, дывела щит мәстәс, муй әнтә. Дыв юхды лупсәт, хуты ванлтупсы дывела шеңк мәстәс. Дыв ән нәмәссәт щимәщ әмәщ ут шиваләты. Кашәң хуят мудты нумәсн юхәтсы. Итәх хуятәт рәт



О.П. Сентепова (Нечу)

мўвел, кәртәд, рәт әхлал оләңән нәмәдмәсәт. Хуйтат вәнт хурасәт вантсәт.

Ши хуятәта, хуйтат мўңева нәтсәт, пәмащипа яснәт лупты ләнхәлўв. Щит вәнт шушийн вәлты хә Иван Кузнецов, Сытомино кўлуп тәхийн рәпитты не Ольга Звягина, Лямина кәрт әшкола-интернат кәщә ими Татьяна Чагина, нявремәт вәндтәты не Галина Лапина, Лямина кўлупн рәпитты не Лариса Осколкова. Па Сәрханл районән вәлты хәннехуятәта, хуйтат мўң хущева юхтылсәт, вән пәмащипа яснәт луплўв!

Мосл лупты, хуты тәм верев округ культура департамент миом грант вухәт унтасн тывәс.

Елена ФЕДОТОВА
Хәнты ясәна гулмащтәс
Надежда ВАХ



Вейтангупсыя юхтум мир



Мойң ҕх пида рэпитчы дэщятыдсәт



Юхтум хуятат епләң няньн дапәтсыйт

В. Тарлина. китум хурәт

Касум мұва рұтыщаты яңхсәт

Мәнум йилуп ол рұтыщаты хәтләт мәр Касум мұва Нуви сәңхум район, Россия вошәт па па хон пеләк мұват эвәлт ар мойң мир юхтылдәс. Кәт семья па хон пеләк Турция мұв эвәлт, Белоруссия мұв, Ямал мұв, Омск, Брянск, Екатеринбург вошәт эвәлт мойң хуятат вәсәт.

Ши хәтләт мәр тәрүм ши мурта ям па етәр вәс. Пурмәсәт лавәлты хотн рәпитты хуятат па кәртәң ҕх сыр-сыр ущхуль касупсәт, вандтупсәт, юнтупсәт

дәщятсәт. Ищки ики ищи мойң хуятат пида вәйтантылдәс. Кәрта юхтум хәннехуятат нюхрум потум няр нюхийн па хұдн дапәтсыйт, щәлта дыв



Мойң мир «Банан» немпи шүңкән хәтәтәлдәсәт

мәрәх па палум вұды вуй пида нянь десәт. Вәнт хұват әмәщлудман шәшийлдәс.

Нявремәта мет ущ-хуля щив юхтыйлдты вәс. Лыв лоньщ әхтыйн навәрсәт па керәтлясәт, юнтсәт, вұдәт вошхисәт. Итәх пушхәт вұды велщи шиваләсәт. Лоньщ элты янхты карты хопн, вұды әхәдн хәтәтәлдәсәт. Вұды әхәдн дыв Юрий Тарлин хәйн наврәдсыйт. «Буран» әхәдн па Сергей Канев па Валентина Тарлина мир тәгәлдәсәт.

Мойң хуятат Ольга Обатина пида хәнты ай кәрн нянь версәт. Лыведа шеңк әмәщ вәс тұт пелды вантты па дыв иньщәссәт, муй щирн тәм кәрн нянь верты рәхл. В. Тарлина юдн вұды вуй паләс па щәдта юхтум мир нянь вуя хәнман десәт па әмәщләсәт.

Ирина Юхдымова па Ольга Обатина хұд па вұды нюхи эвәлт епләң хошум йиңк кавәртсәт.

Вән хуятата шеңк яма нявремәт нәтсәт: Маша Юхлымова, Лола Асалова, Дия Белкина, Аләша Канев, студентат Артём Тарлин па Вика Канева. Наталья па Оксана Федотовчән кавәртты нәтсәңән.

Хәнты йис верәт оләңн путәртсәт па музей хұват мойң хуятат тәгәлдәсәт Марина Кабакова, Елена Федотова па Мария Игишева. Юхтум ҕх хәнты ләмәтсухәт ләмәтман хурамәң хурәт версәт. Шуши хуятат щәта рәпитман еша вух еша павәтсәт.

Щимәщ вандтупсәт па вәйтантупсәт тәд мәр иса верты питлұйт. Мет вән па хурамәң вұды ҕх кәсупсы емәңхәтл товийн ай кер тыләщн питл.

Валентина ТАРЛИНА

Хәнты ясәңа тулмащтәс Надежда ВАХ

Ханты ясанг
(Хантыское слово)
№2 (3518), 24.01.2019

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора –
Кондина Г.Р.
Телефон (3467) 33-22-72

Заместитель главного
редактора – **Вах Н.И.**
Телефон (3467) 33-24-02

Ответственный секретарь –
Рагимов Н.В.
Телефон (3467) 33-24-02

Адрес редакции и издателя:

628011, г.Ханты-Мансийск,
ул.Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул.Маяковского, 14.

Индекс **04393, 54393**

Тираж **2166** экз.
Заказ **227**
Цена свободная

Газета
зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по

Тюменской области,
ХМАО-Югре и ЯНАО.

Свидетельство о регистрации
ПИ №ТУ 72-00796
от 23 января 2013 г.

Мнение авторов
публикации не
обязательно отражает
точку зрения
редакции.